




SLUŽBENI GLASNIK OPĆINE KONJIC

Broj: 5

Konjic, 06.05.2022.



SADRŽAJ

1. Privremena statutarna odluka Grada Konjica 2021

BOSNA I HERCEGOVINA
FEDERACIJA BOSNE I HERCEGOVINE
HERCEGOVAČKO-NERETVANSKI KANTON
OPĆINA KONJIC
OPĆINSKO VIJEĆE

Broj: 03-02-2-1844/22
Konjic, 29.04.2022. godine

Na osnovu člana 9. Zakona o Gradu Konjic („Službene novine Federacije Bosne i Hercegovine”, broj: 17/22, člana 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine”, broj: 49/06 i 51/09) i u skladu s Odlukom o proglašenju Grada Konjica („Službeni glasnik Općine Konjic”, broj: 1/20), Gradsko vijeće Grada Konjica, na sjednici održanoj dana 29.04.2022.godine, d o n i j e l o j e :

PRIVREMENU STATUTARNU ODLUKU GRADA KONJICA

I OPĆE ODREDBE

Član 1.

Ovom Odlukom se privremeno, u skladu sa Zakonom o Gradu Konjic (u daljem tekstu: Zakon), do donošenja Statuta Grada Konjica, uređuje uspostava i organizacija gradskih organa, način njihovog rada, primjena dosadašnjih propisa Općine Konjic, status, obilježja Grada i druga pitanja od značaja za organizaciju i funkcionisanje Grada Konjic (u daljem tekstu: Grad).

Član 2.

Grad Konjic obuhvata teritoriju (područje) dosadašnje Općine Konjic koju čine sva naseljena mjesta, koja se, prema evidenciji Federalnog zavoda za statistiku, nalaze u okviru Općine Konjic na dan stupanja na snagu Zakona o Gradu Konjic.

Član 3.

Grad je jedinica lokalne samouprave i ima svojstvo pravnog lica.

Sjedište Grada je u Konjicu, Ulica Maršala Tita 62.

Član 4.

Grad Konjic je pravni sljednik Općine Konjic i preuzima nadležnosti, prava, obaveze i imovinu Općine Konjic.

Grad preuzima od Općine Konjic: grb, zastavu i druga važeća obilježja Općine Konjic.

Dan Općine Konjic — 16. juni obilježavat će se kao Dan Grada Konjica.

Član 5.

Grad ima pečat.

Oblik, sadržaj, izrada pečata, čuvanje i upotreba pečata regulisat će se posebnom odlukom Gradskog vijeća.

II ORGANI GRADA

Član 6.

Organi Grada su Gradsko vijeće i Gradonačelnik, koji svoje funkcije vrše u skladu s Ustavom Bosne i Hercegovine, Ustavom Federacije Bosne i Hercegovine, Ustavom Hercegovačko – neretvanskog kantona, zakonom, Statutom i ovom Odlukom.

1. Gradsko vijeće

Član 7.

Gradsko vijeće Grada je predstavnički organ građana Grada Konjic, organ lokalne samouprave izabran na temelju općeg biračkog prava na neposrednim izborima tajnim glasanjem, na način određen zakonom.

Gradsko vijeće je organ odlučivanja koji donosi opće i druge akte u okviru samoupravnog djelokruga Grada, te obavlja druge poslove u skladu s aktima iz člana 6. ove Odluke.

Član 8.

Gradsko vijeće ima 27 vijećnika.

Vijećnici Gradskog vijeća vrše svoje dužnosti prema svom slobodnom uvjerenju na dobrobit svih građana Grada, a odgovorni su za ustavnost i zakonitost akata koje donosi Gradsko vijeće.

U skladu sa Statutom, Poslovníkom o radu, te materijalnim mogućnostima Gradskog vijeća, Gradsko vijeće obezbjeđuje uslove za rad, finansijska sredstva i prostorije za rad bez naknade klubovima vijećnika.

Član 9.

Gradsko vijeće u okviru svojih nadležnosti:

- Priprema i dvotrećinskom većinom glasova usvaja Statut Grada ;
- Utvrđuje općinsku politiku u okviru nadležnosti Grada i prati njeno ostvarivanje;
- Usvaja budžet, izvještaj o izvršenju budžeta Grada i završni račun;
- Donosi razvojne, prostorne i urbanističke planove i programe, te provedbene planove, uključujući zoniranje;
- Donosi propise o porezima, taksama, naknadama i doprinosima Grada u skladu sa zakonom;
- Donosi odluke o upravljanju i raspolaganju imovinom Grada;
- Donosi odluke o zaduživanju;
- Donosi programe uređenja građevinskog zemljišta;
- Donosi plan korištenja javnih površina;
- Donosi odluke o organizaciji mjesne samouprave i nazivima ulica, trgova i dijelova naseljenih mjesta;
- Donosi odluke o udruživanju jedinica lokalne samouprave u savez i druge oblike organiziranja;
- Donosi odluke o proglašenju praznika Grada;
- Donosi odluke o nagradama i priznanjima Grada.
- Bira i razrješava predsjednika-cu i zamjenika-cu predsjednika Gradskog vijeća;
- Imenuje članove radnih tijela koje osniva Vijeće, kao i druga lica kada je to zakonom i Statutom utvrđeno;
- Odlučuje o pokretanju postupka opoziva Gradonačelnika/ce;
- Donosi odluke o raspisivanju referenduma;
- Donosi program rada Gradskog vijeća;

- Razmatra godišnje izvještaje o provođenju gradske politike i aktivnostima Gradonačelnika/ce;
- Osniva preduzeća i ustanove za ostvarivanje vlastitih nadležnosti, kao i za obavljanje poslova od interesa za Grad;
- Ocjenjuje rad ustanova i kvalitet usluga u djelatnosti zdravstva, socijalne zaštite, obrazovanja, kulture i sporta najmanje jednom godišnje, te osigurava finansijska sredstva za unapređenje njihovog rada i kvaliteta usluga, u skladu sa potrebama stanovništva i mogućnostima Grada;
- Analizira stanje javnog reda i mira, sigurnosti ljudi i imovine najmanje jednom godišnje, te predlaže mjere prema nadležnim organima;
- Donosi Poslovnik o svom radu;
- Donosi odluke za čije donošenje je nadležan po zakonu, ovom Statutu ili drugim aktima;
- Obavlja druge poslove utvrđene zakonom i Statutom.

2. Gradonačelnik

Član 10.

Gradonačelnik je nosilac izvršne vlasti Grada.

Gradonačelnik se bira neposrednim izborima po postupku utvrđenim zakonom. Mandat gradonačelnika traje četiri godine i vezan je za mandat saziva Gradskog vijeća.

Mandat gradonačelnika izabranog na prijevremenim izborima teče do redovnog isteka mandata Gradskog vijeća.

Gradonačelnika za vrijeme privremene odsutnosti ili spriječenosti zamjenjuje dužnosnik ili službenik gradskih organa uprave odnosno službi za upravu, kojeg on ovlasti.

Dužnost gradonačelnika, u slučaju prestanka mandata prije isteka vremena na koje je izabran, do ponovnog izbora gradonačelnika vrši osoba izabrana od Gradskog vijeća natpolovičnom većinom od ukupnog broja članova Gradskog vijeća.

Član 11.

Gradonačelnik, kao nosilac izvršnih poslova u okviru samoupravnog djelokruga Grada, u okviru svoje nadležnosti:

- Predstavlja i zastupa Grad u skladu sa ustavom, zakonom i Statutom;
- Donosi akte iz svoje nadležnosti;
- Izrađuje i Gradskom vijeću na usvajanje podnosi nacrt i prijedlog budžeta, ekonomske planove, razvojne planove, investicione programe, prostorne i urbanističke planove i ostale planske i regulatorne dokumente koji se odnose na korištenje i upravljanje zemljištem, uključujući zoniranje i korištenje javnog zemljišta;
- Predlaže odluke i druge opće akte Gradskom vijeću;
- Provođi politiku Grada u skladu sa odlukama Gradskog vijeća, izvršava budžet Grada i osigurava primjenu odluka i drugih akata Gradskog vijeća i podnosi izvještaj o izvršenju budžeta;
- Izvršava zakone i druge propise čije je izvršenje povjereno Grada;
- Utvrđuje organizaciju službi za upravu i drugih službi Grada na način da osigura efikasno i efektivno vršenje poslova iz nadležnosti Grada;
- Donosi pravilnik o unutrašnjoj organizaciji službi Grada kojim osigurava kompetentnu, proaktivnu, odgovornu, otvorenu, efikasnu i efektivnu administraciju;

- Realizira saradnju jedinica lokalne samouprave s drugim općinama, gradovima, međunarodnim i drugim organizacijama u skladu sa odlukama i zaključcima Gradskog vijeća i njegovih radnih tijela;
- Podnosi izvještaj Gradskom vijeću o ostvarivanju politike Grada, i svojim aktivnostima;
- Obavlja i druge poslove utvrđene zakonom, drugim propisima, ovim statutom i aktima Gradskog vijeća.

Član 12.

Gradonačelnik je odgovoran za ustavnost i zakonitost akata koje donosi, kao i akata koje predlaže Gradskom vijeću.

Član 13.

Međusobni odnosi Gradskog vijeća i Gradonačelnika zasnivaju se na principima međusobnog uvažavanja i saradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcionisanje i razvoj Grada.

III MJESNA SAMOUPRAVA

Član 14.

Mjesna samouprava u Gradu se ostvaruje u mjesnoj zajednici, kao obaveznom obliku mjesne samouprave, koju Gradsko vijeće osniva svojom odlukom.

Član 15.

Mjesna zajednica nadležna je za obavljanje poslova značajnih za život i rad građana na području mjesne zajednice, te građani putem organa mjesne zajednice odlučuju o tim poslovima, a naročito:

- pokreću i učestvuju u javnoj raspravi kod pripreme i donošenja urbanističkih planova na području mjesne zajednice, pokreću inicijative, daju mišljenja i učestvuju u izgradnji komunalnih objekata i objekata u općoj upotrebi;
- pokreću i učestvuju u raspravama o inicijativama i aktivnostima za razvoj privrede i društvenih djelatnosti;
- brinu o zaštiti osoba kojima je potrebna pomoć i u tu svrhu pokreću saradnju sa stručnim organima u oblasti socijalne zaštite;
- staraju se o razvoju kulture i sporta i stvaraju uslove za dostupnost ustanova i objekata kulture i sporta svim građanima, a pogotovo mladim;
- stvaraju uslove i preduzimaju mjere za očuvanje i zaštitu prirodnih i radom ostvarenih vrijednosti čovjekove sredine;
- drugim poslovima utvrđenim statutom mjesnih zajednica vodeći računa o vrsti i obimu potreba, raspoloživim sredstvima, kao i interesima građana u cjelini.

Član 16.

Mjesna zajednica ima svojstvo pravnog lica u okviru prava i dužnosti utvrđenih Statutom i odlukom o osnivanju.

Član 17.

Poslovi iz djelokruga mjesne zajednice, organi mjesne zajednice, postupak izbora, organizacija i rad organa mjesne zajednice, način njihovog odlučivanja, te druga pitanja od značaja za rad i funkcioniranje mjesne zajednice uređuju se Statutom mjesne zajednice, koji mora biti u skladu sa Statutom Grada.

IV GRADSKE SLUŽBE ZA UPRAVU, STRUČNE I DRUGE SLUŽBE

Član 18.

Poslove lokalne samouprave i uprave iz djelokruga Grada, kao i poslove uprave koje su viši nivoi vlasti (kantonalni i federalni) prenijeli na Grad obavlja gradski organ uprave, na način utvrđen zakonom.

Gradski organi uprave su gradske službe za upravu.

Gradske službe za upravu mogu se osnivati u okviru jedinstvenog gradskog organa uprave.

Gradske organe uprave osniva i njihov djelokrug utvrđuje odlukom Gradsko vijeće, na prijedlog Gradonačelnika, ako zakonom nije drugačije određeno.

Član 19.

Za obavljanje stručnih, zajedničkih i drugih poslova za potrebe Gradskog vijeća, Gradonačelnika, gradskih službi za upravu i drugih organa, mogu se osnivati stručne, tehničke i druge službe kao zajedničke ili samostalne službe.

Službe iz prethodnog stava ovog člana za potrebe Gradskog vijeća osniva Gradsko vijeće, a za potreba Gradonačelnika, gradskih službi za upravu i drugih organa osniva posebnom odlukom Gradonačelnik, u skladu sa zakonom.

Član 20.

Unutrašnja organizacija gradskog organa uprave uređuje se pravilnikom o unutrašnjoj organizaciji koji donosi Gradonačelnik, u skladu sa zakonom.

Pravilnikom iz prethodnog stava ovog člana uređuje se: organizacija gradskog organa uprave, djelokrug rada gradskih službi za upravu, rukovođenje gradskim organom uprave, unutrašnja organizacija gradskih službi i djelokrug rada unutrašnjih organizacionih jedinica, sistematizacija radnih mjesta, odgovornost za obavljanje poslova i zadataka, radna mjesta sa posebnim ovlaštenjima, te druga pitanja od značaja za organizaciju, rad i funkcionisanje jedinstvenog gradskog organa uprave Grada Konjic.

Član 21.

Gradski organi uprave, u skladu sa zakonom, Statutom i ovom Odlukom neposredno obavljaju sljedeće upravne i druge stručne poslove:

1. izvršavaju propise i druge opće akte iz samoupravnog djelokruga Grada;
2. izvršavaju zakone, druge propise i opće akte, prate stanje i provode utvrđenu politiku u oblastima iz njihove nadležnosti u skladu sa važećim federalnim i kantonalnim zakonima i drugim propisima;
3. rješavaju u upravnom postupku o pravima, obavezama i pravnim interesima građana i pravnih osoba iz samoupravnog djelokruga Grada;
4. obavljaju nadzor nad djelatnošću javnih poduzeća i ustanova koje obavljaju poslove na osnovu javnih ovlasti utvrđenih propisima Grada;
5. daju inicijative za rješavanje određenih pitanja iz samoupravnog djelokruga Grada;
6. pripremaju nacрте propisa i drugih općih i pojedinačnih akata iz svoje nadležnosti;
7. obavljaju i druge poslove određene Statutom odnosno ovom Odlukom i drugim gradskim propisima.

Pored poslova iz prethodnog stava ovog člana, gradski organi uprave obavljaju i upravne i druge stručne poslove, koji su federalnim zakonom odnosno zakonom Kantona preneseni na Grad.

V PRIJELAZNE I ZAVRŠNE ODREDBE

Član 22.

Općinsko vijeće Konjic i radna tijela Općinskog vijeća Konjic, konstituisani nakon Lokalnih izbora 2020.godine, nastavljaju sa radom kao Gradsko vijeće i radna tijela Gradskog vijeća sa nadležnostima utvrđenim važećim propisima i ovom Odlukom sve do okončanja prvih narednih lokalnih izbora u skladu sa zakonom.

U slučaju prijevremenog prestanka mandata vijećnika iz sadašnjeg saziva Vijeća, vijećnik kojemu Centralna izborna komisija Bosne i Hercegovine dodijeli mandat, u skladu sa Izbornim zakonom Bosne i Hercegovine, kao sljedećem kandidatu sa liste političkog subjekta na Lokalnim izborima 2020.godine, dat će i potpisati svečanu izjavu sljedeće sadržine:

„Svečano izjavljujem da ću povjerenu dužnost vijećnika Gradskog vijeća Konjic obavljati savjesnom i odgovorno, da ću se pridržavati Ustava Bosne i Hercegovine, Ustava Federacije Bosne i Hercegovine, Ustava Hercegovačko-neretvanskog kantona, zakona i Statuta, zalagati se za ljudska prava i slobode, razvoj demokratije i da ću u svim prilikama štiti interese države Bosne i Hercegovine, Federacije Bosne i Hercegovine, Hercegovačko neretvanskog kantona, Grada Konjica i ravnopravnost naroda i građana.”

Član 23.

Na rad Gradskog vijeća i njegovih radnih tijela primjenjivat će se odredbe važećeg Poslovnika o radu Općinskog vijeća Općine Konjic i Izmjene i dopune Poslovnika o radu Općinskog Vijeća Konjic ("Službeni glasnik Općine Konjic", broj: 1/05, 5/10 i 3/20), ako nisu u suprotnosti sa odredbama Zakona o Gradu Konjic i odredbama ove Odluke.

Eventualna sporna pitanja, koja nisu uređena Poslovníkom iz prethodnog stava ovog člana, regulisat će se zaključkom Gradskog vijećana sjednici na kojoj se pojavi sporno pitanje.

Član 24.

Osobe izabrane ili imenovane od strane Općinskog vijeća nastavljaju sa radom u Gradu Konjic do isteka mandata na koji su izabrani ili imenovani, osim u slučaju da podnesu ostavku ili budu razriješeni na način i po postupku propisanim zakonom.

Član 25.

Općinski načelnik Općine Konjic, koji je neposredno izabran na Lokalnim izborima 2020. godine, nastavlja sa radom kao gradonačelnik sa nadležnostima utvrđenim važećim propisima i ovom Odlukom sve do okončanja prvih narednih neposrednih izbora za Gradonačelnika u skladu sa zakonom.

Član 26.

Općinske službe za upravu i drugi općinski organi i službe (u daljem tekstu: općinski organi) nastavljaju sa radom kao gradske službe za upravu i drugi gradski organi i službe (u daljem tekstu: gradski organi) prema djelokrugu utvrđenom posebnom odlukom i drugim općinskim propisima.

Poslove, arhivu, dokumentaciju, kao i službenike i namještenike općinskog organa uprave iz stava 1. Ovog člana, preuzet će gradski organi danom stupanja na snagu ove Odluke.

Javna preduzeća i javne ustanove čiji je osnivač Općina nastavljaju sa radom kao javna preduzeća i ustanove Grada Konjica.

Općinsko pravobranilaštvo nastavlja sa radom kao Gradsko pravobranilaštvo.

Postojeći organi mjesnih zajednica nastavljaju s radom do izbora novih organa mjesnih zajednica, na način i po postupku utvrđenim Statutom Grada odnosno ovom Odlukom i općim aktima mjesne zajednice.

Član 27.

Gradsko vijeće će donijeti Statut Grada u roku od 12 mjeseci od dana stupanja na snagu ove Odluke. Do donošenja Statuta Grada primjenjivat će se odredbe Statuta Općine Konjic („Službeni glasnik Općine Konjic ", broj: 4/11, 6/11 i 3/20 koje nisu u suprotnosti sa Zakonom o Gradu Konjic i ovom Odlukom.

Član 28.

Važeći propisi Općine Konjic kojima se uređuju pitanja iz nadležnosti Grada, a koji su na snazi na dan donošenja ove Odluke, nastavljaju se primjenjivati do donošenja gradskih propisa, ako nisu u suprotnosti sa Zakonom o Gradu Konjic i ovom Odlukom.

Član 29.

Odluke i druga akta Gradskog vijeća i drugih organa Grada nastavljaju se objavljivati u Službenom glasniku Grada Konjica.

Član 30.

Najkasnije u roku od 90 dana od dana stupanja na snagu ove Odluke, izvršit će se registracija Grada Konjica kod nadležnih organa, te promjena memoranduma, tabli, pečata i druge radnje neophodne za funkcionisanje Grada.

U roku iz stava 1. Ovog člana javna preduzeća i ustanove, te drugi organi čiji je osnivač Općina, izvršit će promjenu memoranduma, tabli i pečata, promjene u sudskom registru i druge radnje u cilju usklađivanja sa odredbama ove Odluke.

Član 31.

Ova Odluka se donosi dvotrećinskom većinom glasova od ukupnog broja vijećnika u Gradskom vijeću. Odluka iz prethodnog stava donosi se javnim glasanjem.

Član 32.

Danom stupanja na snagu ove Odluke prestaje primjena onih odredaba Odluke o proglašenju Grada Konjica („Službeni glasnik Općine Konjic", broj: 1/20), kao i odredbe drugih propisa Općine Konjic koje su u suprotnosti sa odredbama ove Odluke.

Član 33.

Odluka stupa na snagu danom objavljivanja u "Službenom glasniku Grada Konjica", a objavit će se na web stranici Grada Konjica .

Predsjednik Općinskog Vijeća
Kenan Greda, s.r

